

## En scolas egl exteriur

Scolaras e scolars dil gimnasi da Mustér en autras tiaras

(anr/hh) Plir(a)s scolar(a)s dil gimnasi da Mustér ein stai a scola egl exteriur durant las vacanzas d'atun. En pliras tiaras han els saviu rimnar experientschas per la veta. Dapi entgins onns tgira il gimnasi a Mustér bunas relaziuns cun differentas scolas en China, Africa dil sid e Namibia. Quellas relaziuns vegnan nezegiadas era per in brat da scolars. Aschia san giuvenils dil gimnasi a Mustér serender en tiara jasta per emprender d'enconuscher novas fuormas da scola, auters roms ni era la cultura dil liug. Per las scolaras ed ils scolars da lezzas scolas che vegnan a Mustér seporscha la caschun da far las medemas experientschas. Las davosas duas jamnas han pliras scolaras e plirs scolars dil gimnasi a Mustér giu la caschun da visitar scolas a Nanjing, Johannesburg, Kapstadt ni Windhoek.

## Ina nova experientscha per la veta

Scolaras e scolars dil gimnasi dalla claustra a Mustér ein stai a scola egl exteriur

(anr/hh) En connex cun sias stentas da scolar egl avegnir dapli studentas e students digl exteriur ha il gimnasi ed internat dalla claustra a Mustér lantschau avon treis onns in program da brat da scolars cun scolas en differentas tiaras. Durant las vacanzas d'atun che van a fin oz han scolaras e scolars dil gimnasi a Mustér aschia giu la caschun da rimnar novas experientschas egl exteriur. «In'internazionalisaziun prudenta en in tempo adattau d'in gimnasi ei in avantatg, surtut en in temps ch'il mund daventa ina suletta reit. Quei semuossa era claramain tiel gimnasi a Mustér che porscha differents programs a sias scolaras e ses scolars da passentar in temps plein aventuras en in'otra tiara. Cun dar la pusseivladad a giuvenils da sescolar a Mustér sedat da l'otra vart ina mischeida da scolaras e scolars da differentas culturas ch'enriheschan ina l'otra», scrivian ils responsabels pil gimnasi ed internat da Mustér.

## Musica sco finamira

En connex cul program «Exchange» han scolaras e scolars dil gimnasi da Mustér saviu visitar quest october ina scola partenaria en China, Africa dil sid ni Namibia. El rom da quei brat da scolaras e scolars pagan ils geniturs sulettamein il sgol da lur affons, tut igl auter surpren la scola partenaria ni la famiglia hospitonta. Sco cunterprestaziun vegnan giuvenils da lezzas scolas envidai da vegnir el gimnasi a Mustér. Cheu vegnan els involvi il mars vegnent ella turnea da chor. La premissa persuerter ei che la scolara ni il scolar seigi musicals e ch'el seigi prompts d'exercitar independentamein ni cul scolast da musica la musica dalla turnea dil chor. La davosa e quest'jamna han 12 scolaras e scolars dil gimnasi a Mustér nezegiau la caschun da rimnar novas experientschas per la veta en ina dallas treis tiaras. Els han saviu eleger denter pliras scolas: Nanjing (China), Johannesburg ni Kapstadt (Africa dil sid) ni ina scola a Windhoek, la capitala dalla Namibia.

## Scolas cun atgnadads

Ilis absolvents dil fuffergnadi alla scola da lungatg Foreign a Nanjing vegnan confrontai cun roms ch'ei dat buc a Mustér en quella fuorma: La preparaziun da mieds medicinals ord products natirals, calligrafia ni era origami. La scola porscha denton aunc ulteriuras atgnadads ch'eiin buca da cattar aschia a Mustér. Aschia la cultura dalla scola sco tala ni era la cuschina. Tut quei ei ina interessanta sfida. In tut auter maletg sepresenta alla WAP, la «Windhoek Afrikaans Private School» che tgira gia dapi entgins onns ina stretga collaboraziun da brat da scolars cun Mustér. Elia ha degustau leu carn da crocodil e Marlon ei s'avischinaus al lungatg da leu, igl afrikaans.

## Dapertut vegn scolau

Svenja e Madleina van a scola a Johannesburg, leu nua ch'ellas visetan lur cameratas ch'han visitau il gimnasi il mars vargau a Mustér. Fabio ed Andriu ein sedecidi pil marcau da Kapstadt e la scol'aulta Westeford. Quei ei dil reminent ina scola fetg renconuschida ch'astga denton vegnir frequentada sulettamein en in'uniforma da scola obligatoria. Tier tutta fascinaziun ch'in program da scola egl exteriur porscha ei il viadi tonaton cumbinaus cun la finamira che carstgauns giuvens s'entaupien ed emprendien aschia d'enconuscher differentas culturas e modas da viver. Sin fundament da quellas enconuschientschas san els propagar en lur patria toleranza e capientscha per auters carstgauns. «Igl ei ina scola dalla veta che s'auda tier la formaziun gimnasiala complessiva. Ina scola che vul mirar plein fidonza egl avegnir culs eglis da carstgauns giuvens», scriva il gimnasi dalla claustra da Mustér.

## Scola d'unviern e stad

Il gimnasi ed internat dalla claustra da Mustér porscha ina scola d'unviern e da stad per studentas e students digl exteriur che vulan visitar il gimnasi per duas jamnas, viver e studegiar leu tenor in program fetg variont. Sco quei ch'ils responsabels dil gimnasi constateschan daventa quella purschida adina pli tschercada, buc il davos era per quei ch'omisduas parts dils geniturs lavuran era durant las vacanzas da stad ni d'unviern. Quella pusseivladad da scola ei denton era adattada per scolaras e scolars che vulan seperfectiunar durant lur vacanzas.